



Sarajevo, 19.6.2025. godine

MEDIJIMA

SAOPĆENJE ZA MEDIJE

Održan osmi sastanak Pododbora za transport, energiju, okoliš i regionalni razvoj

Na osmom sastanku Pododbora za transport, energiju, okoliš i regionalni razvoj između Evropske unije i Bosne i Hercegovine, koji je održan 19. juna 2025. godine, Evropska komisija je pozvala BiH da u potpunosti provede Sofijsku deklaraciju o Zelenoj agendi za Zapadni Balkan i da intenzivira napore u prelasku na kružnu, klimatski neutralnu, efikasnu i konkurentnu ekonomiju. Od bh. vlasti se očekuje da započnu provođenje Strategije za usklađivanje okolišnog zakonodavstva BiH i usvoje strategiju zaštite okoliša i akcioni plan na državnom nivou, koji trebaju biti usklađeni s pravnom stečevinom EU.

Članovi dvije delegacije su razmijenili informacije o provođenju reformi i preuzimanju propisa EU u oblastima upravljanja vodama i upravljanja otpadom, kvalitete zraka, industrijskog zagađenja, zaštite prirode i biodiverziteta, odnosno, potrebi koordiniranog i harmoniziranog pristupa na nivou cijele države. Predstavnici Evropske komisije su naglasili potrebu jačanja kapaciteta za provođenje zakonskog okvira u ministarstvima, inspekcijama i drugim institucijama u BiH. Pozitivno je ocijenjeno učešće BiH u Mehanizmu Unije za civilnu zaštitu, uz preporuku da je potrebno što prije uvesti evropski broj za hitne slučajeve 112 i formirati Jedinicu za zaštitu i spašavanje na teritoriji cijele države.

BiH treba uspostaviti zakonodavni okvir za klimu u skladu s propisima EU, uključujući zakon o klimatskoj politici kojim se utvrđuju institucionalne nadležnosti, mehanizmi planiranja, izvještavanja i praćenja. Vlasti u BiH, također, trebaju donijeti i početi provoditi integrisanu državnu energetska i klimatsku strategiju u skladu sa smjernicama EU, uspostaviti državni registar emisije stakleničkih plinova i sistem za monitoring, izvještavanje i verifikaciju emisija, te izraditi planove za prilagođavanje klimatskim promjenama.

Predstavnici Evropske komisije su pozdravili napredak u oblasti regionalne politike i koordinaciji strukturnih instrumenata i izrazili očekivanja da će uskoro biti izrađena regionalna razvojna strategija BiH, unaprijeđeni institucionalni, tehnički i administrativni kapaciteti regionalnog razvoja te imenovan DIPAK (Državni IPA koordinator).

Na sastanku se razgovaralo i o ispunjavanju obaveza iz Ugovora o Transportnoj zajednici, usklađivanju bh. zakonodavstva s propisima EU, usvajanju ažurirane transportne strategiju na državnom nivou koja uključuje ciljeve dekarbonizacije, multimodalnosti i digitalizacije, povećanju ulaganja u željezničku infrastrukturu i modernizaciju javnog prijevoza. Članovi bh. delegacije su informirali Evropsku komisiju o napretku u realizaciji projekta deminiranja rijeke Save, odnosno, uspostavi unutrašnjih plovih puteva.

Jedna od tema sastanka bila je i ispunjavanje obaveza iz Ugovora o Energetskoj zajednici, transpozicija propisa EU u ovoj oblasti, te planovi i aktivnosti za preuzimanje Paketa za čistu energiju. BiH mora usvojiti i implementirati okvirnu energetska strategiju koja će biti usklađena s klimatskim ciljevima i zakonodavstvom EU, postepeno ukinuti subvencije i ovisnost od fosilnih goriva, usmjeriti javna sredstva na obnovljive izvore energije i energetska efikasnost te uspostaviti regulatorni okvir za poticanje privatnih investicija u sektor obnovljivih izvora energije. Razgovaralo se i o sigurnijoj opskrbi energijom, dekarbonizaciji i usvajanju propisa o energetska efikasnosti u skladu sa zahtjevima EU.

Članovi delegacije BiH su informirali Komisiju o najnovijim dešavanjima u vezi s izgradnjom skladišta radioaktivnog otpada na lokaciji Trgovska gora i ponovili da BiH neće odustati od ranije utvrđenih stavova.

Osmim sastankom Pododbora za transport, energiju, okoliš i regionalni razvoj kopredsjedavale su Brankica Pandurević, pomoćnica ministra u Ministarstvu vanjske trgovine i ekonomskih odnosa BiH i Heinke Veit, zamjenica voditelja odjela za Crnu Goru i Bosnu i Hercegovinu (DG ENEST). O radu Pododbora više na stranici Direkcije <https://www.dei.gov.ba/bs/stabilization-agreement>.

Direkcija za evropske integracije